

իր բնածին բարեմասնութիւնները և դարձել մի շարք խնդիրներում գրեթէ անկարող և անընդունակ:

ՆՇԱՆԱԳՐՈՒՅԻՆ: Ամուսնական կեանքը Փէրիայում գեռ պահում է իր նահապետական, նախնական դրութիւնն այնպէս, ինչպէս Հայաստանի շատ տեղերում:

ՀԱՍԱԿ: Փէրիա գաւառում ևս ծնողներն իրենց զաւակներին շատ փոքր հասակում են պսակում և մանաւանդ՝ նշանում. բաւական է, որ տղան լինում է 14—15 տարեկան, իսկ աղջիկը 13—14՝ արդէն արբունքի հասած են համարում և հետեւայէս ասում են «հարսանիքի ժուգն է»— (ժամանակն է): Սակայն շատ անգամ էլ ծնողները նկատի չեն ունենում առողջապահական այս ու այն պայմանները և իրենց զաւակներին ամուսնացնում են 13—14 տարեկան հասակում 20—22 տարեկան աղջկայ վրայ, որպէսզի իրենց բան ու գործին մի աշխատող ձեռք աւելացնեն:

Աղջիկ ուզել: Ամուսնութիւնը կատարում է ծնողների կամքով. ամուսնացողներն երբէք իրար չեն տեսնում. նրանք պարտական են հնազանդել իրենց ծնողների կամքին, թէկուզ իրենց սիրածն էլ չլինի: Սովորաբար, ծնողները հանգամանքները յարմար նկատած պարագաններում, իրենց մէջ մի աղջկայ վրայ համաձայնութիւն կայացնելուց յետոյ մի հոգի ուղարկում են աղջկայ տունը, որպէսզի հասկանան նրա ծնողների տրամադրութիւնը. եթէ նրանք համաձայն են, որոշւում է նշանագրութեան օրը:

ՆՇԱՆ ՂԵՆԵԼ: Նոյն երեկոյեան տղայի հայրը հրաւիրում է իր մօտիկ ազգականներին, ծանօթներին և քահանային (որոնք կոչւում են նշանախօս), և նրանց հետ միասին գնում աղջկայ տունը՝ տանելով նշանը—հարսնացւի համար մի մատանի (արծաթից կամ ոսկուց), 10—15 թուման փող և երկու գլուխ շաքար, որը զարդարւած է լինում կարմիր-կանաչ մետաքսէ թելերով, մի ապարանջան և այլն:

Երբ հասնում են հարսնացւի տունը, աղջկայ տէրն ուրախ դիմաւորում է խնամիներին, ներս հրաւիրում, ուր